

Mien - Orn Ging-Sou - Comfort Scriptures

2 Ko^lin^to 1:2-4 Tov mbuo nyei Zaangc Diex Tin-Hungh caux Ziouv Yesu Giduc ceix en ceix baengh orn bun meih mbuo. 3 Mbao oix zuqc ceng mbuo nyei Ziouv Yesu Giduc nyei Die, Tin-Hungh, dongh korv-lienh mienh nyei Zaangc Diex, yaac zanc-zanc orn mbuo nyei hnyouv nyei Tin-Hungh. 4 Mbao maaih nyungc-nyungc kuonx naanh, ninh orn mbuo nyei hnyouv, weic bun mbuo aengx haih orn buangh zuqc haaix nyungc kuonx naanh nyei mienh nyei hnyouv. Tin-Hungh hnangv haaix nor orn mbuo nyei hnyouv, mbuo yaac hnangv wuov nor haih orn mienh nyei hnyouv.

Cong-Mengh Waac 15:13 Hnyouv njien-youh, hmien ziouc njang, mv baac hnyouv nzauh kouv, mba'nciu haih mbaaix.

1 Hungh Douh 8:66 Nqa'haav wuov hnoi hungh diex mbuox baeqc fingx nzuonx. Ninh mbuo buang waac bun hungh diex ziouc nzuonx biauv, za'gengh njien-youh a'hneiv haic weic Ziouv bun ninh nyei bou, Ndaawitv, caux ninh nyei baeqc fingx, I^saa^laa^en Mienh, duqv longx nyei yietc zungv sic.

1 Zunh Doic Douh 16:10 Oix zuqc weic ninh nyei cing-nzengc mbuox bungx waac-maux, bun zimh lorz Ziouv wuov deix mienh nyei hnyouv njien-youh a'hneiv.

Cong-Mengh Waac 12:25 Mienh hnyouv nzauh faanh haiz hnangv ga'naaiv ngatv jienv hniev nyei, mv baac yietc joux longx nyei waac bun ninh haiz hnyouv longx.

Cong-Mengh Waac 13:12 Maaih lamh hnamv oix duqv nyei, yaac maih gaengh duqv, ziouc bun mienh hnyouv nzauh kouv, mv baac duqv daaih ziux hnyouv hnamv oix duqv nyei, se hnangv diuh ziangh maengc nyei ndiangx.

I^saa^yaa 30:26 Taux Ziouv beu ninh nyei baeqc fingx zuqc mun nyei dorngx yaac zorc bun ninh mbuo zuqc mun nyei naanx, hlaax ziouc hnangv mba'hnoi nor njang. Mba'hnoi nyei nyutc oix gauh njang siec gouv, hnangv siec hnoi gapv daaih nyei njang.

Ho^se^yaa 13:8 Yie oix caa jienv ninh mbuo hnangv zuqc guangc dorn nyei jiepv-nyeiz, yie oix betv tong ninh mbuo nyei la'kuotv, yiem wuov yie ziouc hnangv sienh naqv ninh mbuo, yaac hnangv hieh zoih betv ninh mbuo.

1 Saa^mu^en 1:8,10 Hannaa nyei nqox, En^kaa^naa, naaic ninh, "Hannaa aac, meih weic haaix diuc nyiemv, maih nyanc hnaangx? Meih nyei

hnyouv weic haaix diuc nzauh? Maaih yie maiv zeiz gauh longx ziepc dauh dorn fai?" 10 Hannaa nzauh duqv kouv, hnyouv mun haic, nyiemv jienv daux gaux jouh Ziouv.

Singx Nzung 25:16,17 Tov meih huin nzuonx daaih mangc yie, korv-lienh yie, weic zuqc yie ndoqc yaac kuonx naanh. 17 Yie nyei hnyouv nzauh duqv kouv haic. Tov tengx yie biaux ndutv yie nyei kouv naanc.

Singx Nzung 34:18 Ziouv yiem nitv fatv hnyouv mun nyei mienh, yaac njoux hnyouv mun, mba'nziu yuqc nyei mienh.

Singx Nzung 38:8 Yie suei nzengc, kouv taux ndiev. Yie nyei hnyouv mun, njunh jienv yiem.

Singx Nzung 55:4 Yie nyei hnyouv gu'nyuoz za'gengh! mun haic. Zuqc daic nyei jauv haeqv yie gamh nziex gau.

Singx Nzung 61:2,3 Yie nyei hnyouv maih lamh hnamv nyei ziangh hoc, yie yiem jomc lungh ndiev heuc meih. Tov dorh yie mingh taux gauh hlang jiex yie nyei la'bieiv. 3 Weic zuqc meih zoux yie ndaauh kaux nyei dorngx, zoux yie wuonv haic nyei laauh weic biaux ndutv win-wangv.

Singx Nzung 62:8 O meih mbuo zuangx baeqc fingx aah! Oix zuqc zanc-zanc kaux Tin-Hungh. Zorqv ganh nyei hnyouv yietc zungv mbuox Ninh. Ninh zoux yie mbuo ndaauh kaux nyei dorngx.

Singx Nzung 73:26 Yie nyei sin caux yie nyei hnyouv haih mau jienv njiec, mv baac Tin-Hungh se yie nyei hnyouv nyei qaqv yaac yietc liuz zoux yie nyei buonc.

Singx Nzung 77:2,3 Yie zuqc kouv naanc nyei hnoi-nyieqc yie lorz Ziouv, yie ziangh muonz sung jienv buoz maiv dingh liouh nyei daux gaux, mv baac maiv duqv orn hnyouv. 3 Yie hnamv taux Tin-Hungh ziouc tauv domh qieux. Yie jangx taux naaiv deix jauv, haiz hnyouv mau nzengc aqv. Selaa

Singx Nzung 86:11 O Ziouv aac, tov meih njaaux yie hiuv duqv meih nyei jauv weic bun yie haih ei meih nyei zien leiz yangh. Tov bun yie zunv dingc hnyouv, weic taaih meih nyei mbuox.

Singx Nzung 109:22 Weic zuqc yie jomc, ga'naanh haic, yie nyei hnyouv gu'nyuoz za'gengh mun haic aqv.

Singx Nzung 112:7,8 Ninh maiv gamh nziex ciouv nyei fiex, ninh bungx dingc hnyouv wuonv nyei kaux Ziouv. 8 Ninh zunv dingc hnyouv, maiv gamh nziex. Zuov taux buatc ninh nyei win-wangv zuqc suei nzengc.

Singx Nzung 143:4 Weic naaiv yie nyei hnyouv mau jienv njiec, yie nyei hnyouv gengh kouv taux ndiev.

Singx Nzung 147:3 Zuqc hnyouv mun kouv nyei mienh ninh zorc longx yaac beu jienv ninh mbuo zuqc mun nyei dorngx.

Cong-Mengh Waac 14:30 Hnyouv baengh orn bun sin kuh yiem, mv baac

mueic jieqv hanc bun mbungv latv.

Gorngv Seix Zaangc 1:13 Yie liepc hnyouv longc cong-mengh zaah mangc yaac hoqc hiuv yiem naav lungh ndiev zoux nyei nyungc-nyungc sic. Tin-Hungh bun baamh mienh ging jiex nyei sic za'gengh aqc nyei, kouv nyei.

Gorngv Seix Zaangc 2:10 Yie nyei m'zing buatc oix longc haaix nyungc yie maiv ngaengc, yie nyei hnyouv oix zoux haaix nyungc duqv njien-youh yie yaac maiv laanh, weic zuqc yie nyei hnyouv a'hneiv haic yie zoux nyei nyungc-nyungc gong. Naaiv se yiem yie laauh luic duqv daaih nyei zingh nyeic.

Gorngv Seix Zaangc 2:22,23 Mienh yiem seix zaangc hnyouv nzauh, hnyouv kouv jienv laauh luic zoux gong, ninh duqv haaix nyungc? 23 Weic zuqc ninh ziangh seix zaangc nyei hnoi-nyieqc ninh zoux gong, zuqc mun, zuqc nzauh kouv. Liemh lungh muonz zanc ninh nyei hnyouv yaac maiv henh. Naaiv yaac fih hnangv nyei kungx-morngh.

Gorngv Seix Zaangc 11:10 Hnangv naaic, oix zuqc yiem hnyouv zorqv cuotv nzauh faanh nyei sic, yaac simv nqoi haaix nyungc hoic meih nyei sin zuqc kouv, weic zuqc nin dorng ziepc betv nyei ziangh hoc se kungx-morngh nyei sic.

I^saa^yaa 30:29 Meih mbuo oix baaux nzung hnangv meih mbuo jiex cing-nzengc zipv nyei muonz nor. Meih mbuo nyei hnyouv oix njien-youh hnangv mienh biomv hlauv-ndongh nux faaux Ziouv nyei mbong, taux I^saa^laa^en nyei La'bieiv wuov.

I^saa^yaa 57:15 Weic zuqc yiem gauh hlang jiex Wuov Dauh, se yietc liuz yiem, maaih mbuox heuc Cing-Nzengc nyei Tin-Hungh, hnangv naav gorngv, "Yie yiem hlang nyei, cing-nzengc nyei dorngx, yie yaac caux zieqv duqv ganh dorngc, hnyouv mun, nyiemc ganh zoux faix nyei mienh yiem. Weic bun nyiemc ganh zoux faix nyei mienh nyei hnyouv fingv jiez, yaac bun zieqv duqv ganh dorngc, hnyouv mun nyei mienh nyei hnyouv fingv jiez daaih.

I^saa^yaa 65:14 Yie nyei zuangx bou oix baaux nzung weic hnyouv gu'nyuoz njien-youh, mv baac meih mbuo oix heuc cuotv weic meih mbuo hnyouv ba'laqc nzauh. Meih mbuo oix nyiemv kouv weic hnyouv mun duqv siang.

I^saa^yaa 66:13,14 Hnangv maa orn ninh nyei fu'jueiv nyei hnyouv, yie yaac hnangv wuov nor orn meih mbuo nyei hnyouv. Meih mbuo yaac yiem Ye^lu^saa^lem duqv orn hnyouv." 14 Meih mbuo mangc buatc, hnangv naaic meih mbuo ziouc a'hneiv. Meih mbuo ziouc henv yaac wangc siangx. Mienh ziouc zieqv duqv Ziouv nyei buoz tengx ninh nyei zuangx bou, mv baac ninh nyei ga'qieq baetv cuotv bun ninh nyei win-

wangv.

Ye^le^mi 15:16 Ziouv, Nernh Jiex nyei Tin-Hungh aac, yie duqv meih nyei waac se dorngx yie nyei nyanc hopv. Meih nyei waac bun yie njien-youh yaac bun yie hnyouv a'hneiv, weic zuqc yie se gan meih nyei mbuox heuc nyei mienh.

Ye^le^mi 24:7 Yie oix bun ninh mbuo maaih hnyouv hiuv duqv yie se Ziouv. Ninh mbuo ziouc zoux yie nyei baeqc fingx, yie yaac zoux ninh mbuo nyei Tin-Hungh, weic zuqc ninh mbuo oix buangv hnyouv nzuonx daaih lorz yie."

Yo^han 14:1 Yesu aengx gorngv, "Maiv dungx hnyouv huaang hnyouv nzauh. Oix zuqc sienx kaux Tin-Hungh yaac sienx kaux yie.

Yo^han 14:27 "Yie liouh baengh orn bun meih mbuo. Se yie ganh nyei baengh orn yie ceix bun meih mbuo. Yie bun nyei maiv hnangv baamh mienh bun nyei. Maiv dungx nzauh faanh yaac maiv dungx gamh nziex.

Yo^han 16:6 Weic zuqc yie gorngv naaiv deix sic mbuox meih mbuo, meih mbuo nyei hnyouv za'gengh nzauh haic aqv.

Yo^han 16:22 "Meih mbuo yaac hnangv naaiv nor. Ih zanc meih mbuo hnyouv nzauh, mv baac yie aengx oix daaih lorz meih mbuo, meih mbuo ziouc njien-youh orn-lorqc. Naaiv nyungc orn-lorqc maiv maaih haaix dauh haih zorqv duqv cuotv.

Gong-Zoh 2:46 Ninh mbuo hnoi-hnoi gapv zunv yiem zaangc Tin-Hungh nyei biauv yaac yiem ninh mbuo nyei biauv maeqv njuov. Ninh mbuo juangc nyanc juangc hopv, lomh nzoih a'hneiv, longc nzengc hnyouv zoux,

Lomaa 9:2 Yie weic yie ganh nyei fingx, juangc orv juangc mbungv nyei mienh, nzauh duqv kouv haic. Hnyouv zanc-zanc mun jienv yiem.

2 Ko^lin^to 2:4 Yie fiev wuov zeiv fiex nyei ziangh hoc yie gengh! hnyouv mun, hnyouv nzauh, maaih wuom-mueic liouc jienv camv nyei. Yie maiv zeiz oix bun meih mbuo nzauh mv baac oix bun meih mbuo hiuv duqv yie hnamv meih mbuo ndongc haaix camv.

E^fe^so 5:19 Oix zuqc longc singx nzung, ceng Tin-Hungh nyei nzung, caux Singx Lingh bun mienh benx cuotv nyei nzung, laanh caux laanh gorngv. Yaac oix zuqc longc hnyouv baaux nzung ceng Ziouv.